

AKAGAMBO AHA MUSHOMI

Waaba oriyo nooraba omu peegi z'akatabo aka, ninkushabira ngu kikuhwere kwongyera omukago gw'aha nda na Yesu Kristo. Yaaba oriyo nooteekateeka aha muhanda gw'Omusharaba ori iwe wenka, nari ori omu rweteereine, omutima gwawe nigukakwatweho rukundo ei Kristo yaayorekire kurabira omu kubonabonesibwa kwe n'okwetambira aha musharaba. Omu kugyendera hamwe na Kristo kurabira omuri buri kicweka ky'omuhanda gw'Omusharaba, nookatungye oburaingwa n'obwingi bwa rukundo ye, hamwe n'embabazi ze omu kwikiriza kwegarura busya amagara gaawe. Reka buri kigyere kyona eki oraateere omu rugyendo rw'omuhanda gw'Omusharaba orurikwera kikuhwere kwegarura busya- nibukabe obwire bw'emigisha erikurinda amagara gaawe ebiro byona. Obwo orikuteekateeka aha kubonabonesibwa hamwe na rukundo ya Kristo, ninshaba ngu omutima gwawe gushuuruukirwe gumanye amazima, nk'oku yaahaireyo amagara gye ahabwawe, nooyetwa kumukuratira n'omutima ogwijwire rukundo n'okwehayo ahari Ruhanga. Orugyendo rw'omuhanda gw'Omusharaba n'omuringo mukuru gw'okuhindura amagara gaawe kuhikaana n'Omucunguzi waawe, nikwo kugira ngu ku oraarugye omu shaara egi, orekye kuguma nk'oku obaire ori.

N'eshaara nyamwingi z'okukuhwera omu rugyendo
rwawe omuri Kristo,

FR.ALEXANDER MWEBEMBEZI

Yesu Ahurire Community - Karama

Mbarara Archdiocese - Uganda (East-Africa)

Yeetegyereze: Ahabw'abo abaine ekyetengo ky'okuk-
watsa omu kuteera n'okubuzya eshaara egi nangwa
n'ezindi shaara, obuhwezi bwawe nimubaasa
kubuhitsya nari kubwohereza aha Namba
0776688423 /0706 398126

TABLE OF CONTENTS

OKUBAMURIKIRA OMUHANDA GW'OMUSHARABA.....	1
EBIKURU EBY'OKUGYENDERAHO OMU KUSHOMA OMUHANDA GW'OMUSHARABA.....	4
ESHAARA AHARI BURI KICWEKA KY'OMUHANDA GW'OMUSHARABA.....	6
REKA TUTANDIKYE OMUHANDA GW'OMUSHARABA.....	9
OMUHANDA GW'OMUSHARABA.....	10
EKICWEKA KYOKUBANZA (1).....	11
EKICWEKA KYA KABIRI (2).....	14
EKICWEKA KYA KASHATU (3).....	17
EKICWEKA KYA KANA (4).....	20
EKICWEKA KYA KATANA (5).....	23
EKICWEKA KYA MUKAGA (6).....	25
EKICWEKA KYA MUSHANJU (7).....	27
EKICWEKA KYA MUNANA (8).....	30
EKICWEKA KYA MWENDA (9).....	33
EKICWEKA KYA IKUMI (10).....	36
EKICWEKA KY' IKUMI N' EMWE (11).....	39
EKICWEKA KY' IKUMI N' IBIRI (12).....	42
EKICWEKA KY' IKUMI N' ISHATU (13).....	45
EKICWEKA KY' IKUMI N' INA (14).....	48
EKICWEKA KY' IKUMI N' ITANO (15).....	51
ESHAARA Y'OKUHENDERA.....	54
ESHAARA Y'OKWEHONGYERA OMUSHARABA.....	55
ESHAARA Y'OKUZOOKA ERIKUHINDURA AMAGARA G'OMUNTU.....	56
EBY'ESHONGORO BY'OMUHANDA GW'OMUSHARAABA.....	62

OKUBAMURIKIRA OMUHANDA GW'OMUSHARABA

Omuhandanda gw'omusharaba ti kweshengyereza kwonka - n'orugyendo rukuru rw'okwegarura busya omu by'omutima. N'orugyendo rw'okugyendera aha rubaju rwa Yesu omu bwire bwe bw'okuhereruka, kandi obw'obusaasi- obwo yaaheza kucwerwa orubanja, okushaasha, okufa kandi n'okuziikwa- ekyarugirwemu okuzooka kwe n'ekitiinwa. Oku kuramaga okurikwera nikutwetera naitwe kubagana ahari rukundo entarengwa, hamwe n'emigisha ehimintuka kuruga omu musharaba gwa Kristo, kutuhitsya aha kweteeranira kimwe na Ruhanga.

Omuhandanda gw'Omusharaba nigukomookyera kimwe omu bakiristo ba kare abaramagi, abaabaire baine omutima gw'okwehayo, bakeeshuka omu ndembo za Yeruzalemu, bakuratiire Yesu omu muhandanda gwe gw'Omusharaba ogw'okuhereruka. Emyaka ku yaagyenzire neehwa, oku kweshengyereza okw'ira kwahindurwamu Omuhanda gw'Omusharaba ogu turikuhimbisa ebiro ebi. Buri kicweka ky'Omuhanda gw'Omusharaba, n'ekikorwa ky'amaani kandi ekihuriire, omu turikweterwa kwehabura obwire bukuru obw'okubonabonesibwa kwa Kristo, hamwe n'orugyendo rwe rw'obusaasi ahabw'okutucungura.

Kwonka n'obu biri bityo, Omuhanda gw'omusharaba nigweshumbira kimwe aha ky'okwijuka eby'oku-bonabonesibwa - n'orugyendo rw'amatsiko hamwe n'obusinguzi. Omusharaba, ira ogwabaire gutuura guri akamanyiso k'okugaywa n'obusaasi, gukarugwamu akamanyiso k'obusinguzi bwa rukundo ya Ruhanga aha bantu be. Amazima aga nigo Ekereziya, obwo erikubangirwa obwengye bw'orukiiko rwa Vatikaano orwa kabiri, egarura busya amagara kurabira omu kwongyeraho Okuzooka, nk'ekicweka ky'Omuhandu gw'Omuusharaba ekirikuhereruka. Ekicweka eki ekirikuhereruka nikitwiha aha kuguma nitureeba omu kiina eki Yesu yaaziikirwemu, kitutwara omu magara agatarihwaho ag'ekitiinwa, n'okutwijutsya ngu orugyendo rwa Kristo tirurahendereire aha kufa. Kristo azookire buzima! Omusharaba, n'obu guri omwanya gw'obusaasi, gukahinduka ogw'obusinguzi ahu amagara gasinguriire rufu, ei ekyererezi kyakira omu mwirima, kandi n'ahu rukundo ya Ruhanga etucungurira twena.

Oburungi bw'Omuhandu gw'Omuusharaba, n'okutwetera twena hamwe okugyendera hamwe na Yesu, butari bwire bw'ekisiibo bwonka, baitu n'amagara gaitu goona. Buri kicweka ky'Omuhandu gw'Omuusharaba nikyeshumbira kimwe obwire bw'okwehabura; n'obwire bw'okutwetera okubugana Kristo we wenka omu magara agaitu. Kuruga omu biturikurabamu, ebi-

turemereire, obusaasi bwaitu, tubone kuhika aha matsiko g'obusinguzi n'okurokorwa kwaitu- orugyendo oru, nirugamba ruhika omu bishengye by'emitima yaitu. Twaba turyo omu rugyendo orurikwera, nitwetwa okutuura emitwaro yaitu yoona, okufa ahabw'ekibi, tubone kuzookyera na Kristo omu magara masya. Omusharaba nigutuheereza amaani naitwe kwekorera emisharaba yaitu obwo twine amatsiko n'omuhimbo, turikumanya ngu Kristo, Omurokozi waitu aguma naitwe, naatuha amaani okuguma omu businguzi bwe.

Okwekwatsa Omuhanda gw'Omusharaba kakutwongyere kutwimusyemu omuriro musya omu mitima yaitu. Reka gukwongyeremu rukundo y'okugyendera omu bigyere bya Kristo, n'okwehayo n'okwikiriza kutarikutengyesibwa, kutari omu bwire bw'ekisiibo bwonka, kureka buri izooba. Aha musharaba niho omwirima gw'ekibi gusingurirwa, ahu okusaasirwa kusheshekyera kutaine kiteera-ha-mukono, kandi n'ahu tutungira engabirano z'okutuhwera kuguma nitwimuka. Omuhanda gw'Omusharaba tigwe muheru gw'orugyendo, kureka orugyendo rwona niruhenderera omu kuzooka. Buri kigyere kyona eki orikuteera, ijuka ngu: Ogwo owaayeheireyo ahabwaitu kugyenda omuhanda ogu ariho ahuriire - kandi naaguma nagyenda naiwe, hati n'ebiro byona.

EBIKURU EBY'OKUGYENDERAHO OMU KUSHOMA OMUHANDA GW'OMUSHARABA

1. Tandika n'Akamanyiso k'Omusharaba

Tandika eshaara yaawe orikukora akamanyiso k'Omusharaba:

Omu iziina rya Taata, n'erya Mwana, n'erya Mutima Orikwera. Amiina.

Eki nikimanyisa okutandika eshaara yaawe, n'okweta Ruhanga kuba naiwe omu bwire bwawe bw'okwehabura.

2. Ekikorwa ky'okushaba okusaasirwa

Ekikorwa ky'okushaba okusaasirwa, n'akamanyiso akarikworeka ku Yesu we wenka yaaheeheireyo ahabw'ebibi byaitu, n'okutushaba ngu tweteise twihire aha mutima. N'akaire k'okwekyehesa n'okwegarura ahansi tutakatandikire muhanda gw'Omusharaba, turikureeba ngu hariho ekyetengo ky'okushaba okusaasirwa, n'okutuura twine akakwate n'ekitambo kya Kristo.

3. Shoma eshaara y'okutandika

Bwanyima y'ekikorwa ky'okushaba okusaasirwa, oshome eshaara y'okutandika (okorese erikuba etebeekanisiibwe, nari endiijo shaara yoona ei oraa-siime) okutebeekanisa omutima gwawe n'ebiteekat-eeko byawe ahabw'okwetebeekanisiza omuhanda gw'Omusharaba.

4. Ahari buri kicweka ky'omuhanda gw'Omusharaba, omwebembezi arangirira ekicweka

Ku oraabe nooyeshengyereza n'abandi, omwebembezi arangirira ekicweka, agumize:

5. Nitukuramya Ai Kristo, kandi nitukusiima.

Abashomi bagarukamu:

Ahabw'okuba naiwe waacungwire ensi nootufeerera aha musharaba!

Waaba nooyeshengyereza wenka, okirangirire kandi okyegarukiremu.

6. Okushoma eishomo omu Baibuli

Omwebembezi ashoma ekyahandiikirwe ekihikaine n'ekicweka ky'Omuhanda gw'Omusharaba. Eishomo eri niriba nirijutsya ebyabaireho ahari Kristo omu kicweka ky'Omuhanda gw'Omusharaba ekyo.

Waba nooyeshengyereza wenka, yeshomere iwe wenka eishomo eryo

7. Okwehabura, nari okweshengyereza ohunami

Eishomo ryazeza okushomwa, omwebembezi ayegyeseho omu bugufu, nari ahunamaho kakye atarikugamba. Obwire obu omuntu ayehabure aha bukuru bw'ekicweka ky'Omuhanda gw'Omusharaba, n'okushaba kweshengyereza bahunami n'okwehabura.

8.Eshaara

Bwanyima y'okwehabura, nari n'okwehabura ohunami,
oshome eshaara ezi:

Tataitwe

Kasingye Maria

Ekitiinwa kube ahari Patri

9. Okushabira abaafiire

Bwanyima y'eshaara ezi, oheerezeyo eshaara
ahabw'abaafiire:

Ai Mukama, Obahe ekihumuro ekitahwaho,
obajwisize omu iguru omushana ogutaraara

Eshaara ahari buri kicweka ky'Omuhandagw'Omusharaba

Obwo orikuraba omuri buri kicweka ky'Omuhandagw'Omusharaba, oheerezeyo eshaara ezaawe hamwe n'ebigyendererwa byawe. Yimukiza Ruhanga abo abarikushaasha, nari abaine emirabanamu etari emwe, obwo barikuteerana obusaasi bwabo hamwe n'obwa Kristo. Mworekye ahari buri kicweka ngu muriyo nimugyenda na Yesu kurabira omu busaasi bwe. Reeba ebyakoziawe, amaraka hamwe n'akashaasho k'abantu ahari buri kicweka. Oyeyikize iwe wenka kuteekateeka munonga n'okwehikaanisa n'ekyabaireho buri murundi. Murekye kutaragaza kuruga aha kicweka ky'Omuhandagw'Omusharaba okuza aha kindi - twara akaire oikize amakuru gibara kicweka kuhika omu mutima gwawe.

REKA TUTANDIKYE OMUHANDA GW'OMUSHARABA

Omu iziina rya Taata, n'erya Mwana, n'erya Mutima Orikwera. Amiina.

Eshaara Y'Okwetiisa

Taata omunyambabazi, nk'omwana omunaganagi (Rwakirare), ninkugarukira n'okwekyehesa n'omutima guhendekire, bwanyima y'okumanya ebibi byangye. Naanye ningamba n'obusaasi nti, “Nkacumura ahari iwe, n'ahabw'ekyo tinshemereire kwetwa omwana waawe.” Baitu, omu mbabazi zaawe, ninyesiga noiya kunyakiira, onsaasire, ondiindire omuri rukundo n'engabirano zaawe.

Yesu Kristo, Omucunguzi w'ensi, nyemereire omu maisho gaawe, omutima gwangye gwekoreire omutwaro gw'ebibi. Nk'omushuma owaayeteisize, ninshaba: “Mukama, onyijukye ku oraahikye omu bukama bwawe.” Onyozye n'eshagama yaawe, kandi ompeereze amaani mbaase kugyendera aha byegyeso byawe, omuri rukundo n'okweteisa, mpaho mbaase kukukuratira n'obwesigwa okukiraho. kandi ompeereze amaani mbaase kugyendera aha byegyeso byawe, omuri rukundo n'okweteisa, mpaho mbaase kukukuratira n'obwesigwa okukiraho.

Mutima Orikwera, iwe burugo bwa rukundo n'amazima, yeza omutima gwangye, kandi onyijuze n'obusingye bwawe. Nyorekyerera omu muhanda gw'okuhikiirira, mbone kugyenda nk'omwana w'omushana, nyijwire rukundo ya Kristo omu bindikukora byona. Mpwera kwekorera omusharaba gwangye n'omuhimbo, ndikwesiga oburinzi bwawe kumpitsya omu kuhikiirira.

Taata ow'omu iguru, ninyeteisiza kimwe ebibi byangye ebi ndikumanya n'ebi ntarikumanya, nikushaba n'okwekyehesa ku onganyira. Ndikwesigira kimwe embabazi zaawe n'engabirano zaawe, ninyeta omu burinzi bwawe obwijwire rukundo, ndikukumanya ku buri kaanya oyeteekateekire kugaruka kunyakiira omu ka yaawe. K'embabazi zaawe zingarure busya, kandi ninkagumizemu nintuura buri izooba omu muhanda ogurikukushemereza n'okuhaisa ekitiinwa Omucunguzi wangye Yesu Kristo. Amiina.

ESHAARA Y'OKUTANDIKA

Mukama Yesu, obwo ndikutandika naiwe Omuhanda gw'Omusharaba orurikwera, ninyija ahari iwe n'omutima oguhendekire, ogwijwire okwekyehesa. Iwe owaayokoreire omutwaro gw'ebibi byaitu okabitwara aha musharaba, ninkushaba ku omba haihi okanyebembera omu kwehabura kwangye. Omutima gwangye nigukeeyigurire rukundo yaawe, ei waasheesire ahabwangye, omu muhanda gwawe gw'Omusharaba ogurikwera.

Mutima Orikwera, ninkushaba ku onyeza omu bwengye n'omutima. Yeebembera ebiteekateeko byangye n'eshaara zangye omu burikwera, kandi ompeereze obwengye bw'okumanya ekitambo ekikuru ekya Yesu. Mpwera mbaase kwakiira emigisha n'embabazi ebi orikwenda kunta omu mutima, omu rugyendo oru rwonu.

Bikira Maria Omuhikiriire, Nyina w'amaganya, mba haihi obwo ndikugyendera omu bigyere by'Omwana waawe. Rukundo yaawe n'amaani gaawe nibikanyebembere, mbaase kweyongyera kuhika haihi na Yesu okurabira omu butonganirizi bwawe. Nyegyesa okugyendera omu kwikiriza, amatsiko

hamwe na rukundo etarikubaangaanisa.

Mukama Yesu, ninshaba omugisha gw'okukuguma haihi, nyegyere aha kushaasha kwawe, mpaho mbaase kuhindurwa amaani ga rukundo yaawe. Ninkatungye okukizibwa kuruga omu mahuta gaawe, kandi oikirize amagara gangye garee-bekyerwemu rukundo yaawe, n'okwetamba kwawe.

Okurabira omuri ogu muhanda gw'Omusharaba, garura busya okwikiriza kwangye, nyongyera omutima gw'okukunda, kandi ompe amaani mbaase kuhamira omu kukuheereza n'ekitiinwa kyawe. Ninkabagane rukundo yaawe n'abantu boona abu ndikuhikaana nabo, kwenda ngu obukama bwawe bumanywe kandi bukundwe hanu omu nsi. Amiina.

EKICWEKA KYOKUBANZA (1)

PILAATO NACWERA YEZU ORUBANJA RW'OKUMWITA



**Nitukuramya Yesu, nitukusiima
Okuba niwe wacungwire ensi n'otufeera aha musharaba**

Matayo 27:22-31

Pilaato nawe yababuuza ati: Mbweni shi ngire nta Yesu orikwetwa Kristo? Boona bati: Abambwe aha musharaba! Nawe ati: Ahanki Akozire kibi ki Kwonko bo bakizaho kuyomba bati: Abambwe aha musharaba. Pilaato kuyaareebire ataine ku aragire, kandi ku harikwija kubaho akajagararo, yaihayo amaizi, yaanaabira engaro omu maisho g'abantu naagamba ati: Nyowe ndi mwere aha shagama y'ogu muntu ohikiriire: murwemarire! Abantu boona baagarukamu bati: Eshagama ye ebe niitwe yaatukurira n'abaana baitu. Atyo abarekurira Baraba: kandi kuheza kuteza Yezu ebyasha amuhayo kubambwa aha musharaba. Bwanyima abaserukare b'ogwo mutegyeki omukuru baatwara Yesu omu ishengyero baateeragiraye eihe ryona ery'abaserukare, baamujuura ebijwaro bye, baamujweka omunagiye gurikutura. Reero baazinga ekirunga ky'amahwa, baakimuta aha mutwe, baamukwatsa orubingo omu mukono gwe gwa buryo, baamutsimbira amaju nibamushungisha bati: Singa, Mugabe w'Abayudaya! Batyo baamucwera amacwante baakwata orwo rubingo, baarumuteeza aha mutwe. Kubaaherize kumushungisha, baamujuura ogwo mu nagiro, baamujweka ebye, baamutwara kumubamba aha musharaba.

Katutekateke kumwe aha kicweka eki;

Nitubaasa kuba turasingisiriziibwe emanja turikuturwa busha. Nitubaasa kuba twabonaboneseibwe. Nitubaasa kuba ba kyangirwe hataine n'omuntu orikwenda kutuhwera. Nitubaasa kwereeba nk'ababeereire ekizibu bagyenzi baitu. Reka amaganya gaitu goona tugeegyekyerere Mukama. Yesu, owaatuzirwe busha, akeemerera yaaguma ahunani omu maisho g'abari-kumutabaariza. Naayetegyereza obusaasi bwaitu. Reka okwekyehesa kwe kube nikwo kwaba obusingye bwaitu.

- **Hunamaho ogaruke otekateke aha kicweka eki;**
- **Hayo ekyetaago kyawe;**

Shoma eshaara ezi;

- Taitaitwe ow'omu iguru.....
- Kasingye Maria.....
- Ekitinwa kube ahari Patri.....
- Ai Mukama obahe ekihumuro ekitahwaho.....

EKICWEKA KYA KABIRI (2)

YEZU NIBAMUHEKYESA OMUSHARABA



Nitukuramya Yesu, nitukusiima
Okuba niwe wacungwire ensi n’otufeera aha musharaba.

MATAYO 8: 16-17

Ogwo mwabazyo, baamureetera baingi abaabaire batembirwe ebyago: ebyo byago yaabibingisa ekigambo kandi yaakiza boona abaabaire barwaire. Ekyo kyahikiiriza eki Isaaya omurangi yaagambire ati: We wenka akatwara eminyangararo yaitu, yaayekorerwa endwara zaitu.

NAINGA

MATAYO 11: 28 – 30

Yaimwe abaruhire n'abaremereirwe, nimwije ahariinye, mbaruhuure. Mwekorere omugamba gwangye, muunyegyereho; ahabw'okuba nintwaza gye, haza ndi omucureezi omu mutima; nibwo muraatungire amagara gaanyu ekihumuro. Ahabw'okuba omugamba gwangye gwanguhi, n'omutwara gwange tigurikuremeera.

Katutekateke kumwe aha kicweka eki;

Yesu naayikiriza omusharaba gwe - kutari kugira ngu kyorobi, kwonka nigwo muhanda gw'okurabamu kworeka rukundo ye eijwire. Buri rutambwe rwona oru arikuteera rwijwire obusaasi, kwonka rwine ekigyendererwa. Omusharaba ogu t'ogwe wenka-baitu n'ogwaitu twena. Nigwo gwekoreire ebibi byaitu, amarira gaitu, endwara zaitu n'okutiina kwaitu.

Omutwaro gwona ogu tureekoreire, naatubangira. Ensi ku erikwenda kutugarura ahansi - twaba turi omu kuganya, turemiirwe, twangirwe, endwara zitunyanga-raize, nari n'okwehwa amatsiko, ka twijukye ngu omusharaba titugwekoreire twenka. Yesu atwine naatugyenda aha rubaju. Naamanya obusaasi bwaitu, natwebembera kutuhitsya aha kutambirwa, kutuha amatsiko, n'okutuhitsya aha kuzooka.

- **Hunamaho ogaruke otekateke aha kicweka eki;**
- **Hayo ekyetaago kyawe;**

Shoma eshaara ezi;

- Taitaitwe ow'omu iguru.....
- Kasingye Maria.....
- Ekitinwa kibe ahari Patri.....
- Ai Mukama obahe ekihumuro ekitahwaho.....

EKICWEKA KYA KASHATU (3)

YEZU NAGWA OGW'OKUBANZA



Nitukuramya Yesu, nitukusiima
Okuba niwe wacungwire ensi n'otufeera aha musharaba.

ISAAYA 53: 6-8

Tweena tukahaba nk'entaama, twateishuka; buri omwe yaatora omuhanda gwe. Nyakubaho yaamutungikirira ebibi byaitu. Akaitwa kubi, yaabonabonesibwa kwonka tiyaateeza, yaaba nk'omwana gw'entaama ogurikutwarwa kwitwa; nari nk'oku entaama ehunama eri omu maisho g'abarikugishara ebyoya. Nawe nikwo ataraashamize kanwa ke. Akaitwa kubi, yaacwerwa orubanja, baamutwara. Mbweni omu b'obusingye bwe, n'oha owaateekateekire ngu akaihwa omu nsi y'abahuriire, yaitwa, yaitwa ahabw'ebicumuro by'abantu bangye?

• **Katutekateke kumwe aha kicweka eki;**

Yesu ahabw'okuremeererwa omusharaba nagwa; kutari kugira ngu taine maani, kwonka kuri okugira ngu ayokoreire okutahikiirira kwaitu. Naasangana, kutari kugira ngu n'okuremwa, baitu kuri okwenda kutworeka ngu naayetegyereza obweremwa bwaitu. Naitwe turagwire omu kibi, okwohibwa, nari okwehwa amatsiko. Baitu nk'oku Yesu arikugaruka akaimuka, naitwe nitubaasa kugaruka nitwimuka.

Omu bwire bwaitu bw'obweremwa, titusigirweho. Yesu naaguma atukwaitse omukono kutwimutsya. Reka

twijuke emirundi ei tusigireho Ruhanga, reero n’emitima eshashaanukire, tumushabe okusaasirwa. Embabazi ze tizigira bugarukiro, na rukundo ye buriiho etuura eyeteekateekire kutwakiira. Tihariho kugwa okwaku-murema kutwimutsya tukagaruka tukeemerera. Okurabira omu kwegarukamu, naatuheereza amaani g’okwimuka n’okugaruka kugyendera omu mbabazi ze. Embabazi ze nizitwimutsya, na rukundo ye etugarura busya.

- **Hunamaho ogaruke otekateke aha kicweka eki;**
- **Hayo ekyetaago kyawe;**

Shoma eshaara ezi;

- Taitaitwe ow’omu iguru.....
- Kasingye Maria.....
- Ekitinwa kibe ahari Patri.....
- Ai Mukama obahe ekihumuro ekitahwaho.....

EKICWEKA KYA KANA (4)

YEZU NABUGANA NYINA



Nitukuramya Yesu, nitukusiima
Okuba niwe wacungwire ensi n'otufeera aha musharaba.

LUKA 2: 33-35

Ishe na nyina w'omwana kubaabire nibatangaarira ebyabire nibimugambwaho, Simeoni yaabaha omugisha, yaagira Mariya nyina ati: Omwana ogu akateebwaho, ngu baingi omuri Isiraeli bagwe, kandi baingi baimukye. Akateebwaho kuba akamanyiso aku batariikiriza, ngu ebiteekateeko by'abaingi bibone kushuuruuka; kandi naiwe rurura eryakucumita omutima.

• **Katutekateke kumwe aha kicweka eki;**

Omu kaanya aka, Yesu naabugana Mariya nyina omu muhanda gurikuza Karivariyo. Amaisho gaabo bombi nigareebana, gaijwire rukundo n'obusaasi. Omutima gwa Mariya gwacumitwa rurara ahabw'okureeba omutabani ari omu busaasi, kwonka yaaguma ahamire. Ka twijukye Maaweitwe ori omu iguru, We orikwetegyereza obusaasi n'enaku byaitu. We owaazaire Yesu, akamukuza, kandi akamureeba naabonabonesibwa, niwe mutonganirizi waitu ohikire. Omu bwire bw'obusaasi n'okurabanamu, reka tumwetuurire, turikumushaba kutushabira, turikumushaba amaani n'okutuhumura. Nk'oku Mariya yaagumire n'Omutabani, naitwe nikwo arikuguma naitwe, ayeteekateekire kutwebembera n'okumutuhitsya.

Ka tweheyo okushoma esapuri, twikirize Mariya agyende naitwe atutonganirire. Omu bworekyerezi bwe burungi, nitutungiramu amaani g'okuhama, n'amatsiko ga rukundo etakatunagiiriraga. Naakagumizemu akatushendekyereza omu rugyendo rwaitu, ataireho n'okutwijutsya ku tutari twenka omu busaasi bwaitu.

- **Hunamaho ogaruke otekateke aha kicweka eki;**
- **Hayo ekyetaago kyawe;**

Shoma eshaara ezi;

- Taitaitwe ow'omu iguru.....
- Kasingye Maria.....
- Ekitinwa kibe ahari Patri.....
- Ai Mukama obahe ekihumuro ekitahwaho.....

EKICWEKA KYA KATANO (5)

SIMONI OMUNYASIRENE NABANGIRA YEZU OMUSHARABA



Nitukuramya Yesu, nitukusiima
Okuba niwe wacungwire ensi n'otufeera aha musharaba.

MARIKO 15: 21

Mpaho baabugana omuhinguzi Simooni owa kureene, ishe Alekisandero na Ruufo, owaabaire naaruga omu kyaro; baamugyema kumwekorerera omushabara.

• **Katutekateke kumwe aha kicweka eki;**

Obundi nituba nitwetaaga obuhwezi. N'obumwe, abantu abandi nibeetwa kutwekorereraho emitwaro yaitu ahabw'akaanya. Emirundi emweija, naitwe nitwetwa kugira ondiiho muntu ou twayekorereraho omusharaba. Tutatiina kwikiriza obuyambi, kandi nabwo tutakaayehuzya abandi bantu baaba nibatwetenga. Rukundo neeyorekyerwa omu kuhwera. Reka twikirize, nka Simooni, kuhwerana omu rugyendo rw'ensi egi. Ka tweheyo okushoma esapuri, twikirize Mariya agyende naitwe atutonganirire. Omu bworekyerezi bwe burungi, nitutungiramu amaani g'okuhama, n'amatsiko ga rukundo etakatunagiiriraga. Naakagumizemu akatushendekyereza omu rugyendo rwaitu, ataireho n'okutwijutsya ku tutari twenka omu busaasi bwaitu.

• **Hunamaho ogaruke otekateke aha kicweka eki;**

• **Hayo ekyetaago kyawe;**

Shoma eshaara ezi;

- Taitaitwe ow'omu iguru.....
- Kasingye Maria.....
- Ekitinwa kube ahari Patri.....
- Ai Mukama obahe ekihumuro ekitahwaho.....

EKICWEKA KYA MUKAGA (6)

OMUKAZI NASHUSHURA YEZU AHA MAISHO



Nitukuramya Yesu, nitukusiima
Okuba niwe wacungwire ensi n'otufeera aha musharaba.

ISAAYA 53: 2-3

Manya ogwo muheereza akakurira omu maisho ga Nyakubabo nk'ekibyaire kito yaaba nk'omuzi oguri omu itaka ryomire. Akaba ataine oku arikushusha, n'obu kwakuba okushemera aha maisho, ngu tumureebe; nari okugira oburungi bw'okureebwa, ngu tumwetengye. Akagaywa, yaayangwa abantu, yaaba omuntu w'obujune, otuura nareeba enaku. Kandi nk'ou abantu baima amaisho akagaywa; naitwe titwamwetamu kaabuntu.

• **Katutekateke kumwe aha kicweka eki;**

Veronika akareeba Yesu oku ari omu busaasi, nawe yaamworeka ekikorwa ky'embabazi. Naitwe, reka tufeyo kureeba okushaasha kw'abandi bantu abaturi aha rubaju. Ekigambo ky'embabazi, okumukwatiraho, okumushabira nibibaasa kuba ekitambaare ekitirukisiimura aha maisho ag'abari omu busaasi.

• **Hunamaho ogaruke otekateke aha kicweka eki;**

• **Hayo ekyetaago kyawe;**

Shoma eshaara ezi;

- Taitaitwe ow'omu iguru.....
- Kasingye Maria.....
- Ekitinwa kube ahari Patri.....
- Ai Mukama obahe ekihumuro ekitahwaho.....

EKICWEKA KYA MUSHANJU (7)

YEZU NAGWA OGWA KABIRI



Nitukuramya Yesu, nitukusiima
Okuba niwe wacungwire ensi n'otufeera aha musharaba.

ABAFILIPi 2: 6-7

We nobu araabe yaabaire ari omu rugyero rwa Ruhanga, tarateekakire okwingana kwe na Ruhanga ku kiri ekintu ky'okuhamiraho. Kureka akeihaho ekitiinwa, yaaba nk'omuhuuku, yaazaarwa nk'abantu.

• **Katutekateke kumwe aha kicweka eki;**

Orugyendo nirweyongyera kuguma, Yesu naagwa omurundi gwa kabiri. Omubiri gwe gwaherize kuhwa amaani, kwonka rukundo ei ainiire abantu neemugyemesereza kugumizamu. Naamanya eki kirikumanyisa okugumizamu, naasangana aine okugyemeserezibwa, okugwa ahansi arikwehayo kukora ekihikire.

Naitwe, obundi nitugwa omu kibi nikyo kimwe, obweremwa nibwo bumwe. Haza tuhwa amaani. Twehurira nituhemuka, turikutamwa, nangwa n'obundi tutwaririzibwa kuhanika. Baitu Yesu tarahwaire matsiko. Akagaruka yaimuka, kitari ahabwe wenka, baitu ahabwaitu.

Otakaaremera ahansi omu bweremwa bwawe, omu kibi nari omu buhemukye. Reka kuguma notekateka ngu iwe tokaahinduka okaruga omu kibi. Byona obitarire Yesu. Tarikwija kukucwera orubanja - We naakuhikaho. Embabazi ze nizikirira kimwe hare obw-

weremwa bwawe, kandi rukundo ye ni mpango okweshumbira kimwe ekibi kyawe. Reka akwimutsye. Murekye akukize. Garuka oyemerere nawe.

- **Hunamaho ogaruke otekateke aha kicweka eki;**

- **Hayo ekyetaago kyawe;**

Shoma eshaara ezi;

- Taitaitwe ow'omu iguru.....
- Kasingye Maria.....
- Ekitinwa kube ahari Patri.....
- Ai Mukama obahe ekihumuro ekitahwaho.....



EKICWEKA KYA MUNAANA (8)

YEZU NAGUMYA ABAKAZI BA YERUSALEMU



Nitukuramya Yesu, nitukusiima
Okuba niwe wacungwire ensi n'otufeera aha musharaba.

LUKA 23: 27-32

Ekimbuuro kihango ky'abantu kyamukuratira, hamwe n'abakazi baingi abaabaire nibamucurira nibee-maamaata. Yezu nikwo kubahindukira akabagira ati: Imwe bahara ba Yerusalemu 'mwe, murekye kuncurira, kureka mwecurire kandi mucurire n'abaana baanyu. Manya obunaku buryahika, obu abantu barigiriramu bati: Ka n'ab'omugisha abakazi engumba, n'ab'enda zitakazaarahoga, n'ab'amabeere gatakontsyaga! Obwo nibwo barigambira enshozi bati: Mutushwekye! Mbenu ku baraabe nibagira bati omuti omubisi, ogwomire guryashura ki? Kandi hakaba hariho abandi babiri enkonzi z'ebibi, abaatwairwe na Yezu kwitwa.

• **Katutekateke kumwe aha kicweka eki;**

Nangwa n'omu busaasi bwe nyamwingi, Yesu akahumuriza abandi bantu. Akagamba n'abakazi na rukundo, kandi yabahumuriza. Reka naitwe twijukye ngu okugirira abandi embabazi tikushemereire kutuhwamu, n'obu twakuba nitushaasha. Omu busaasi bwaitu, nitubaasa kugumizamu nituhuumuriza abandi. Reka obusaasi bwaitu bube oburugo bw'emigisha n'okutambira abo abatwetooroire.

- Hunamaho ogaruke otekateke aha kicweka eki;
- Hayo ekyetaago kyawe;

Shoma eshaara ezi;

- Taitaitwe ow'omu iguru.....
- Kasingye Maria.....
- Ekitinwa kube ahari Patri.....
- Ai Mukama obahe ekihumuro ekitahwaho.....



EKICWEKA KYA MWENDA (9)

YEZU KRISTO NAGWA OGWA KASHATU



Nitukuramya Yesu, nitukusiima
Okuba niwe wacungwire ensi n'otufeera aha musharaba.

ABAROOMA 7: 18-25A

Ahabw'okuba nimmanya ngu omuriinye, nikwo kugira ngu omu buntu bwangye, ku hatabamu karungi koono. Manya n'obu nyenda kukora ekirungi, kwonka mbura agakikora. Ekirungi eki nyenda tikyo nkora, kureka ekibi eki ntenda nikyo nkora. Reero ku ndaabe nkora eki ntenda, nikwo kugira ngu tiinye nkikora, kureka n'ekibi ekintuuramu. N'ahabw'ekyo nshanga haribo eiteeka, ngu ku mba niinyenda kukora ekirungi, ekibi kimba haihi. Manya omu mutima gwangye nsiima eiteeka rya Ruhanga; kwoka omu ngingo zangye, nshangamu erindi iteeka eririkurwanisa ery'omu bwengye bwangye, rimpindura omuhuku w'eiteeka ry'ekibi ekituura omu ngingo zaangye. Ai bambe, nyowe omuntu enshoberwa! N'oha orinjuna ogu mubiri gw'okufa? Ruhanga naakasingye kureeba ngu nyine Omujuni Yesu Kristo Mukama waitu!

• **Katutekateke kumwe aha kicweka eki;**

Yesu ariyo naaza kuhendera orugyendo rwe, kwonka yaagaruka yaagwa. Omubiri gwe, oguriyo nigujwererana, gwaherize kuhwa amaani, takibaasa kwehangaana kwekorera omusharaba. Okugwa kwe kw'omurundi gwa kashatu n'akamanyiso k'okworeka obusaasi obu yaabaire arimu, akamanyiso k'obw'omuntu bwe. Baitu n'obu yaabaire yahwaire atyo amaani, akeehangaana yaagaruka yaimuka.

Mukama, naitwe titwine maani. Naitwe tugwire emirundi mingi - ebirooto byaitu byabura kuhikiirizibwa, twahendekyera busha, emirabanamu y'ensi yaareebeka etarikuwayo. Nikireebeka turi nk'abagyerizeho kaingi, kwonka twaguma nituremwa. Kwonka nk'oku buri kugwa, waabaire ogaruka okaimuka, naitwe nitubaasa. Amaani gaawe g'okuzooka naitwe nigo turikwetenga.

Mukama tuhwere twashusha nk'abarikuhwa amaani. Oburemeezi bw'okuremwa ku buraatukize amaani, otwijutsye ngu iwe torehwaire matsiko kandi toragumire ahansi. Okatuzookyera, kandi noija kutuhwera kugaruka kuzooka. Nitwesiga ngu twaba tukwine, nitubaasa kwemerera burunga, tugumizemu n'orugyendo rwaitu. Ti nshonga n'emirundi engahi ei tugwire, titurikwija kuhwa amaani. Twaba twine amaani gaawe, orugyendo rwaitu rw'amagara g'obukiristo nitwija kuruhendera kurungi.

• **Hunamaho ogaruke otekateke aha kicweka eki;**


• **Hayo ekyetaago kyawe;**

Shoma eshaara ezi;

- Taitaitwe ow'omu iguru.....
- Kasingye Maria.....
- Ekitinwa kube ahari Patri.....
- Ai Mukama obahe ekihumuro ekitahwaho.....

EKICWEKA KYA IKUMI (10)

YEZU NACWIJUBWA EBIJWARO



Nitukuramya Yesu, nitukusiima
Okuba niwe wacungwire ensi n'otufeera aha musharaba.

YOHANA 19: 23-24

Abaserukare, ku baaherize kubamba Yezu, baatwara ebijwaro bye, baabibaganisa omu miteeko ena, buri omwe yaatwara gumwe. Ekanzu ye ekaba etabaziirwe, kureka erukirwe yona okwiha omu maraca okuhitsya aha bigyere. Batyo bagambirana bonka bati: Tutakaagitaagura; haakiri tugiteerere eteenyu kurreba oraabe mukama waayo. Ekyo kikabaho kuhikiiriza ekyahandiikirwe ekirikugira ngu: Bakabagana ebijwaro byangye, n’emyenda yangye baagiteerera enteenyu.

• **Katutekateke kumwe aha kicweka eki;**

Yesu nibamujuura ebijwaro nibamusiga ajwaire busha, n’ekitiinisa kye kitakimanywa omu maisho g’ensi egi. Ari aho ni kateyamba, nibamushunga ahemukire, ekirikworeka amazima ngu obw’omuntu bwaitu tiburikushangwa omu bijwaro n’omu bindi bintu ebi twine, kureka omuri rukundo ya Ruhanga.

Mukama, tuhwere turugye omu kwetunguura, okweshereka omu bintu by’ensi, hamwe n’okwekoma aha bintu ebirikuhingura. Tuhwere tuhumurire omu mazima, nk’oku okubaho kwaitu kurikushangwa omuri iwe wenka.

Otwiheho ebyo byona ebirikuturemesa kutunga emigisha yaawe, kandi buri kaanya tujwekye ekijwaro ky’okujunwa.

- Hunamaho ogaruke otekateke aha kicweka eki;
- Hayo ekyetaago kyawe;

Shoma eshaara ezi;

- Taitaitwe ow'omu iguru.....
- Kasingye Maria.....
- Ekitinwa kube ahari Patri.....
- Ai Mukama obahe ekihumuro ekitahwaho.....



EKICWEKA KY' IKUMI N' EMWE (11)

YEZU NABAMBWA AHA MUSHARABA



Nitukuramya Yesu, nitukusiima
Okuba niwe wacungwire ensi n'otufeera aha musharaba.

LUKA 23: 33-43

Ku baahikire omu mwanya ogurikwetwa Empanga y'Omutwe, baamubambira aho aha musharaba hamwe n'enkonzi z'ebibi ibiri, omwe aha rubaju rwe rwa buryo n'ondi aha rwa bumoshu. Yezu yaagira ati: Taata, obasaasire; tibarikumanya ki barikukora. Bwanyima baabagana ebijwaro bye nibabiteera enteenyu. Abantu bakaguma aho nibamushamaarira. Abategyeiki bo baamuteerera enaku nibagira bati: Ka yaajunire abandi, mbenu naayejune ku araabe ari Kristo entoore ya Ruhanga! Abaserukare ku baahikire haihi, nibaza kumuha viino y'encenku, nabo baamushungisa, nibagira bati: Ku oraabe ori Omugabe w'Abayudaaya, yejune! Kandi ahaiguru ye hakaba hariho ekihandiko ekirikugira kiti: OGU NIWE MUGABE W'ABAYUDAAYA. Omwe aha nkozi z'ebibi abaabaire bahanikirwe aho, yaamuseetera naagira ati: Tiiwe Kristo? Yejune, naitwe otujune! Kwonka mugyenzi we tahwama, amuteisa ati: Torikutiina Ruhanga n'akakye? Manya waacwerwa orubanja rw'okufa nkawe. Nangwa itwe kitushemereire, ahabw'okuba tutuzirwe ebitwakozi. Atyo agira ati: Yezu, ku oraahikye omu bukama bwawe, onyijukye. Onu amugarukamu ati: Buzimazima ninkuhamiza, eri izooba noija kuba hamwe naanye omu mwanya gw'obunanukye.

• **Katutekateke kumwe aha kicweka eki;**

Obusaasi bwamurenga obwo barikumukomerera n'emisimaari omu biganja n'ebigyere bye. Omubiri gwe gwona n'ebironda, baitu omutima gwe niguguma gutweyiguriire. Omu busaasi bwe, natworekyera kimwe rukundo ye ey'aha ntango y'omutima gwe. Ebironda bye n'akakamanyiso k'okwehayo ahabwaitu. Reka tureebe aha musharaba, kwonka tutakaareebaho obusaasi bwe bwonka, baitu tureebeho na rukundo ei atwiniire. Mukama, tuhwere kwemera n'okwakiira ebironda ebi twine omu magara gaitu. Twegyese okugira okukunda n'obu kiraabe nikishaasha. Reka tutarigaruza ebigyere enyima kuruga aha musharaba, kureka tuguhamireho, turikukimanya ngu okurabira omu busaasi bwaitu, nitubaasa kuhitsya amatsiko n'okukizibwa aha bandi bantu.

• **Hunamaho ogaruke otekateke aha kicweka eki;**

• **Hayo ekyetaago kyawe;**

Shoma eshaara ezi;

- Taitaitwe ow'omu iguru.....
- Kasingye Maria.....
- Ekitinwa kube ahari Patri.....
- Ai Mukama obahe ekihumuro ekitahwaho.....

EKICWEKA KY' IKUMI N' IBIRI (12)

YEZU NAFEERA AHA MUSHARABA



Nitukuramya Yesu, nitukusiima
Okuba niwe wacungwire ensi n'otufeera aha musharaba.

MATAYO 27: 45-54

Okwiha aha shaaha ya mukaaga ensi yoona ekashwekwa omwirima okuhitsya aha shaaha ya mwenda. Kandi nk'aha shaaha ya mwenda, Yezu yaa-hooga n'eiraka rihango, ati: Eli, Eli, lama sabakitaani? Amakuru ngu: Ruhanga wangye, Ruhanga wangye, ahabw'enki wantsigaho? Bamwe aha baabaire beemereire aho, kubaakihuriire, baagira bati: Manya naayeta Eliya! Omwe aharibo ahonaabo yairuka, yaakwata ekyangu, yaakijabika omu viino y'encenku yaakishokamu orubingo, yaakimuha ku kinyuunyuuta. Kwonka abandi baagira bati: Reka, tureebe Eliya ku araabe naija kumujuna! Atyo Yezu agaruka agamba n'eiraka rihango, ahayo amagara ge. Ago magingo omukingo gwa Nyaruju gutemukamu emitanda ebiri, okwiha eruguru okuhika ahansi, ensi etengyeeta, enkiri zaatika, ebituuro biiguka, n'emitumbi mingi y'abarikwera abaabaire bagwejegyeire ehimbuuka. Bwanyima Yezu ku yaaherize kuzooka omu bafiire, abarikwera abo baaruga omu bituuro, baataaha omu rurembo orurikwera, baabonekyera baingi. Omukuru w'abaserukare igana hamwe n'abu yaabaire aine nibarinda Yezu, kubaareebire omutsisa n'ebyabaho, baatiina munonga, baagira bati: Buzimazima ogu abaire ari Omwana wa Ruhanga!

• **Katutekateke kumwe aha kicweka eki;**

Akaire k'okweheerayo kimwe!!! Yesu, owaahaireyo buri kimwe - Amagara ge, Rukundo ye, n'omwitsyo gwe byona ebyasheeshekire ahabwaitu. Kyahwaire. Omurimo gw'okucungura omuntu gwahenderwa. Ka twemerere ahansi y'omusharaba, turikwehuriramu rukundo ya Yesu, nookukimanya ngu okufa kwe nikwo kwaturugiiremu okucungurwa. Yesu, okeehayo ahabwaitu. Twegyese naitwe okukuhamiraho, okwehayo kuheereza abandi, rukundo n'okwehayo. Ni tukabure kwebwa omuhendo gw'okucungurwa kwaitu.

- **Hunamaho ogaruke otekateke aha kicweka eki;**
- **Hayo ekyetaago kyawe;**

Shoma eshaara ezi;

- Taitaitwe ow'omu iguru.....
- Kasingye Maria.....
- Ekitinwa kube ahari Patri.....
- Ai Mukama obahe ekihumuro ekitahwaho.....

EKICWEKA KY' IKUMI N' ISHATU (13)

YEZU NAHANURWA AHA MUSHARABA



Nitukuramya Yesu, nitukusiima
Okuba niwe wacungwire ensi n'otufeera aha musharaba.

MATAYO 27: 55-58

Reero aho hakaba hariho abakazi baingi, nibareebera hangahari. Abo bakazi bakaba barugire Galilaaya na Yezu, bamushendekyereize nibamuheereza; barimu Mariya Magadaleena, Mariya nyina wa Yakobo na Yozefu, kandi na Nyina wa beene Zebedaayo. Omwabazyo kugwakiikire, haija omushaija omutungi owa Arimataaya, orikwetwa Yozefu, owaabaire nawe ari omutendekwa wa Yezu. Yaaza ahari Pilaato, yamushaba omutumbi gwa Yezu. Pilaato nawe yaaragiira ku bagumuha.

• **Katutekateke kumwe aha kicweka eki;**

Omubiri gwa Yesu gwahanurwa aha musharaba gwa-teebeba aha biberwa bya Nyina, haza omutima gwe gwacweka. We owaamworoire akamukuza, akamureeba nanyeeba, hati akiikiire omubiri gwe gutakirimu magara. Omu busaasi bwe, harimu rukundo ey'omunda. Naitwe ka tube nka Mariya, tweteekateekire kwakiira byombi okushemererwa hamwe n'obusaasi, twine obwesigye omu ntebeekanisa ya Ruhanga. Mukama, nitureeta ahari iwe ebicweka by'emibiri yaitu ebihwaire amaani n'ebyehwaire amatsiko. Nitubita omu mikono yaawe, nk'oku Mariya yaakukiikiire omu mikono ye. Rukundo yaawe neekatutambire ebironda

byaitu, kandi n’okuzooka kwawe nikukatwongyeremu
amagara masya kuruga omuri ago agaabaire gaafiire.

- **Hunamaho ogaruke otekateke aha kicweka eki;**
- **Hayo ekyetaago kyawe;**

Shoma eshaara ezi;

- Taitaitwe ow’omu iguru.....
- Kasingye Maria.....
- Ekitinwa kibe ahari Patri.....
- Ai Mukama obahe ekihumuro ekitahwaho.....



EKICWEKA KY' IKUMI N' INA (14)

YEZU NAZIIKWA



Nitukuramya Yesu, nitukusiima
Okuba niwe wacungwire ensi n'otufeera aha musharaba.

MARIKO 15: 42-47

Omwabazyo ku gwakiikire, haza riri eizooba ry'Okweteguura, niryo ryebembera Sabato, Yosefu owa Arimataaya omuhanuuzi mukuru w'eishengyero, nawe owaabaire ategyereize obukama bwa Ruhanga, yaayetuura Pilaato n'obumanzi, yaamushaba omutumbi gwa Yezu. Pilaato Kyamutangaza okuhuriira ngu yaafiire; nikwo kweta omukuru w'abaserukare igana, akamubuuza ku araabe buzimazima yaafiire, Ku yaaherize kumanyisibwa ku yaafiire, yaikiriza Yozefu kutwara omutumbi. Mpaho onu yaagura omwenda gwa kitaani, yaahanura Yezu, yaamuzinga omuri ogwo mwenda, yaamuta omu kituuro ekyabaire kishorogotoroirwe omu rukiri; bwanyima yaakumbagaza eibaare, yaarikinga aha munwa gwakyo. Haza Mariya Magadaleena na Mariya nyina wa Yose baareeba ahi yaamuta.

• **Katutekateke kumwe aha kicweka eki;**

Yesu yaateebwa omu kituuro, kandi omu kaire ako waashusha oti ebye byahwa. Ensi yoona yashwekwa omwirima, haabaho akaceceko k'amaani. Kwonka nitumanya amazima ngu ugu twigwo muheru. Egi n'entandikiro butandikiro. Mukama, nitureeta ahari iwe ebituuro ebiri omu magara gaitu, ebicweka byaitu ebiri nk'ebifiire, ebirooto byaitu ebi twaziikire, ebironda

byaitu ebi tuteekateeka ngu tibirikubaasa kukira.
Nitwesigira kimwe endagaano yaawe, ngu bwanyima
y'ekituuro hariho okuzooka. Ogarura amagara ahu
gaba gatakyesigwa kubaho. Nituta ahansi y'ebigyere
byawe byona ebyafiire ebiri omuri itwe, twine obwesigye
ngu omu bwire bwawe noiya kubigarurira amagara.

• **Hunamaho ogaruke otekateke aha kicweka eki;**

• **Hayo ekyetaago kyawe;**

Shoma eshaara ezi;

- Taitaitwe ow'omu iguru.....
- Kasingye Maria.....
- Ekitinwa kube ahari Patri.....
- Ai Mukama obahe ekihumuro ekitahwaho.....

EKICWEKA KY' IKUMI N' ITANO (15)

YEZU NAZOOKA OMU BAFU



**Nitukuramya Yesu, nitukusiima
Okuba niwe wacungwire ensi n'otufeera aha musharaba.**

MATAYO 28:1-6

Bwanyima Sabato ku yaahwaire, aha kiro ky'okubanza omu wiiki, omushekye ku gwabaire nigijuguta, Mariya Magadaleena na Mariya ondiijo baaza kureeba ekituuro. Reero haabaho omutsisagw'amaani; maraika wa Nyakubaho yaashuma naruga omu iguru, yaija yaakumbagaaza eibare, yaarishutamaho. Enshusha ye akaba ari nk'omurabyo, neibijwaro bye nibyera nk'orubaare. Abarinzi ahab'okumutiina baatetema, baaba nk'abakabaire. Kwonka maraika yaagira abo bakazi ati: Mutatiina; ahabw'okuba nimmanya kumuri-kusherura Yesu obambirwe aha musharaba. Bwenu aha tariho; azookire nk'oku yaagambire. Nimwije mureebe aha baire ahu abaire arambaire.

• **Katutekateke kumwe aha kicweka eki;**

Ekituuro kyashami kirimu busha. Eibaare rihiroweho. Rufu yaasingurwa. Yesu yaazooka, nk'oku yaagambire. Ekyererezi kyabinga omwirima, amatsiko gaagarukaho. Obusaasi bw'aha musharaba tigwo muheru, baitu n'omuhanda gw'okuhika aha businguzi.

Mukama Yesu Nyakuzooka n'ekitiinwa, yebare kutworeka ngu tihariho busaasi oburengire obutakuhwa, ti hariho kiro ekiri kiraingwa munonga, nari ekituuro ekiri omuheru. Otuhwere kwikiririza omu maani g'Okuzooka kwawe, kutuurira omu kwikiriza,

n'okugaruka kugira amatsiko g'okuruga omuri buri kimwe ekitukomire.

Tutemu omuhimbo gw'okusiga enyima emyenda y'omu bituuro ey'obwoba, ey'ekibi, n'okwehwa amatsiko, n'okugumizamu turikugyendera omu kyererezi ky'amagara masya. Nk'oku waasingwire rufu, tuhwere kusingura byona ebitaine mugasho ebiri omu magara gaitu. Amaani g'okuzooka kwawe nigakagarure busya emitima yaitu, amaka gaitu, ebirooto byaitu hamwe n'okwikiriza kwaitu.

Alleluia! Mukama ozookire, kandi ahuriire ebiro byona. Amiina.

- **Hunamaho ogaruke otekateke aha kicweka eki;**
- **Hayo ekyetaago kyawe;**

Shoma eshaara ezi;

- Taitaitwe ow'omu iguru.....
- Kasingye Maria.....
- Ekitinwa kube ahari Patri.....
- Ai Mukama obahe ekihumuro ekitahwaho.....

ESHAARA Y'OKUHENDERA

Ruhanga Taata otukunda, n'emitima eijwire okusiima, nitukwebaza, ahabw'ekirabo ekirikukira ebirabo ebindi, eky'Omwana waawe Yesu Kristo Mukama waitu. Omu kuganga kwe n'okufa, akeekorera omutwaro gw'ebibi byaitu, kandi yatwigurira n'omuhanda kwenda kumanya obwijwire bwa rukundo ye. Nitusiimira kimwe okwetamba kwe, obwesigwa bwe obutarikufunguka, n'okuguma naitwe omu magara gaitu.

Yebare emigisha eturugirwa omu rugyendo oru orw'omuhanda gw'Omusharaba, ei twijukibwa oburaingwa bwa rukundo ya Yesu, n'amatsiko agu atuheereza twena abamukurata. Nitwesiimira omu kuzooka kwe, turikukimanya ngu okurabira omuri we, nituhindurwa basya.

Taata, tuhwere okuguma tuhembire etaara ya rukundo ye omu magara gaitu, kuteekateeka aha mbabazi ze, n'okutuura n'emitima eijwire okusiima ahabw'okucungurwa oku yaatutungiire. Amagara gaitu nigakagumizemu gari ekihongwa ky'okusiima ahabw'ekihembo rugambwa eky'amagara gye, n'okushemererwa ahabw'okutuzookyera. Eki twakishaba omu iziina rye eririkwera. Amiina.

ESHAARA Y'OKWEHONGYERA OMUSHARABA

Mukama Yesu owa bambirwe aha musharaba ahabw'ebibi byaitu, ba naanye.

Ai Musharaba ogurikwera ogwa Yesu, ngirira embabazi.

Ai Musharaba ogurikwera ogwa Yesu, nyihaho ekibi kuruga omu magara.

Ai Musharaba ogurikwera ogwa Yesu, mbingaho ekiniga n'obusharire byona ebiri omuriinye.

Ai Musharaba gwa Yesu, mbeera ekyererezi ekihikire!

Ai Musharaba gwa Yesu, yongyera omuriinye amagara g'okweshengyereza.

Ai Musharaba gwa Yesu, ndinda amasitaani agarikuz-engyerera.

Ai Musharaba gwa Yesu, nkomoorora ahu ndikwetaaga kukomoororwa.

Ai Musharaba gwa Yesu, ntambira ahu ndikwetaaga kutambirwa.

Ai Musharaba gwa Yesu, ndiinda akabi koona ak'okufa ekitararirainwe.

Ai Musharaba gwa Yesu, eka yangye ogirinde akabi koona.

Ai Musharaba gwa Yesu, bingira kimwe omutima mubi kurugira kimwe omuriinye.

Ai Musharaba gwa Yesu, heereza emigisha emirimo y'emikono yangye.

Ai Musharaba gwa Yesu, nyimutsya omu by'entaasya

yangye.

Ai Musharaba gwa Yesu, nshukaho omugisha gw'obusinguzi.

Ai Musharaba gwa Yesu, nteeraho omuhanda ahu gutari.

Ai Musharaba gwa Yesu, nyongyeramu omutima gw'okukunda Ruhanga.

Ai Musharaba gwa Yesu, nyongyeramu omutima gw'okukunda bagyenzi bangye.

Ai Musharaba gwa Yesu, reka ngyendere omuhanda gw'okucungurwa.

Mukama Yesu Nyakubambwa kandi Nyakuzooka, ngirira embabazi hati n'obutwire bwona.

Amiina!!!



ESHAARA Y'OKUZOOKA ERIKUHINDURA AMAGARA G'OMUNTU

Mukama Yesu Nyakuzooka,

Ninyija omu maisho gaawe n'omutima gw'okusiima n'okutiina, ndikwijuka amaani g'Okuzooka kwawe, agu abakwikiriza boona batungiramu amagara. Iwe owaasingwire rufu, ekibi n'ekituuro, ninyija ahu ori hati n'omutima gucureire, n'okuheerayo kimwe amagara gangye ag'enyima, aga hati hamwe n'ag'omu maisho aha busunguzi bw'amaani g'Okuzooka kwawe.

Mukama Yesu Nyakuzooka,

Nindangirira ngu okurabira omu kuzooka kwawe, nyine amagara masya. Nk'aiwe oku waazookire omu bafiire, naanye nonyeta kurugira kimwe omuri ebyo byona ebirikunkoma eby'ensi, kuruga omu marira, kuruga omu kuremwa, kandi okukira munonga, kurugira kimwe omu buremeezi bwona obu omuzigu sitaani arikuta omu maisho gangye. Ninkusiima ahabw'amagara masya agaarugire omu kuzooka kwawe. Amagara gangye goona ningateera kimwe omu bushoboorozi bwawe, n'okushaba ngu gabaase kuhindurwa, gagarurwe busya, gazookyere omu magara agu orikuheereza.

ekirikwetenga okugaruka kwimukibwa, kandi ninyesiga noiija kureeta amagara ahu gabaire gatari.

Mukama Yesu Nyakuzooka omu bafiire,

Nindeka buri kintu ekiri omu magara gangye ekirikundeetera okutaikiriza Ruhanga. Ninyangira kimwe okufeerwa ekigyendererwa kya amagara gangye, okufa kw'omujinya, okufeerwa okushemererwa, hamwe n'okufeerwa obusingye. Ninkoma kandi nkabukira omutima gw'okuhwa amaani, gw'okweshobera, n'ogw'okwehwa amatsiko. Nimpendagura buri kintu kyona ekirikureeta okutiina, okuhemuka hamwe n'okwecwera orubanja, na byona ebi omuzigu Sitaane yaakoreise kunkomera omu kituuro ky'ebibi byangye eby'enyima. Omu kuzooka kwawe, Nindangirira obusinguzi, kandi na buri kintu ekiri omuriinye ekyabaire kifiire kiriyo nikitunga amagara busya. Nindangirira obusinguzi bwawe ahari buri kyago kya rufu hamwe n'okuremererwa.

Mukama Yesu Nyakuzooka,

Ahabw'okuzooka kwawe, okasingura amaani goona ag'omuzigu Sitaani na rufu. Obwa hati ningyendera omu maani g'Okuzooka kwawe, n'okurangirira obusinguzi ahari buri kicweka ky'amagara gangye, eky'omuzigu sitaane yaabaire nagyezaho kuntwara ho, kwita nari kucwekyereza. Nindangirira ku hatariho ky'okurwanisa kyona ekiheesirwe kundwanisa ekirikubaasa kugumaho (Is.54:17), ahabw'okuba iwe

Mukama Yesu, niwe oba butandikiro bw'okusingura kwangye. Nindangirira okuzooka kwawe nk'akamanyiso k'obusinguzi bwangye ahari buri rugamba, rwe-by'omutima, hamwe na ibara mbeera erikureebuka nk'etarikubaasika.

Mukama Yesu, kurabira omu kuzooka kwawe,

Nindangirira okukizibwa omu mubiri gwangye. Ah'okurwara kuri, oburwaire, nari ekirikuteganisa omubiri, ninyeta amaani g'okuzooka kwawe, okushuuma gakareeta okukizibwa. Ninshaba okugarurirwa amagara, ahabw'okuba ninkimanya ngu ahabw'oku-teerwa n'okuhutaazibwa kwawe ahabw'ebicumuro byaitu, nikwo kurikunkiza (Isaaya 53:5). Nk'oku waazookire nooruga omu kituuro, oikirize ngu naanye buri kicweka kyangye ky'omubiri ekirikuteganisibwa oburwaire, obusaasi nari endwara, nibiija kugaruka nibigira amagara, amaani n'omugasho. Ninshaba okugaruka kuba gye kw'omubiri gwangye, hamwe n'obutonde. Amaani g'Okuzooka kwawe nigakagarure amagara omu mubiri gwangye, mbone kugyendera omu magara masya agu wampeereza.

Mukama Yesu Nyakuzooka,

Ninshaba okuhimbuuka kw'okushemererwa kwangye hamwe n'obusingye. Ahu habaire hari obusaasi, okutuntura, nari okukangarana, ninshaba obusingye bw'okuzooka kwawe okwijura omu mutima gwangye, n'omu biteekateeko byangye. Nyijuza n'okushemererwa okurikuruga omu kumanya ngu nkacungurwa iwe okwehayo nk'ekitambo, kandi ngu tihaakiriho ekindi kyona omu nsi egi ekikirikubaasa kunyihaho okushemererwa kw'okujunwa kwangye. Nindangirira ngu tinkibaasa kukangananisibwa okwerarikirira, okuti-ina nari okweshobera, ahabw'okuba Okuzooka kwawe kumpaire okushemererwa oku ensi etarikubaasa kunyihaho.

Mukama Yesu, kurabira omu kuzooka kwawe,

Ninshabira okwimuka kw'ekigyendererwa kyangye hamwe n'orweto rwangye. Garura busya okukunda hamwe n'ebirooto ebi waateire omuriinye. Ahu naakuba naayeshangire mbuzire, nari ntarikumanya kurungi omuhanda, ninkushaba ngu ogarure omu buteeka ekigyendererwa kyangye, kandi onyebembere omu muhanda ugu wanteekateekyeire. Mpweera kutuura nk'oku ndi, nyijwire, kandi ntarikutiina kuremeererwa, ndikukimanya ku ori naanye ahu ndikuba naahika hoona. Ninyesigira kimwe enteekateeka yaawe, kandi

nnimanya ngu amaani g'Okuzooka kwawe nigaija kumbaasisa kuhika ahu waateekateekyeire amagara gangye kugarukira.

Mukama Yesu Nyakuzooka,

Nimpayo omubiri gwangye kuba ekitambo ekihuriire, ekirikwera kandi ekirikusiimwa Ruhanga (Abarooma 12:1). Amaani g'Okuzooka kwawe nigakanyijuze buri izooba, mbaase kutuura ahabwawe n'okugarurira ekitiinwa Eiziina ryawe omuri byona ebi ndikukora. Reka amagara gangye gabe obujurizi burikumara aha maani g'Okuzooka kwawe agarikugarura busya. Mpweera kugyendera omu magara masya, nyeheereireyo kimwe kukora eki orikwenda, mpamiire omu businguzi obu wampaire.

Mukama Yesu Nyakubambwa kandi Nyakuzooka, Ninkusiima ahabw'ekiconco ky'amaani ky'Okuzooka kwawe. Ninkusiima ahabw'amatsiko, amaani, hamwe n'amagara masya agu obwa hati nyine omuriiwe. Ninkweheereza nyena, kandi ninyesiga ngu ahabw'Okuzooka kwawe, noiya kugumizamu nonyorekyerera kuruga omu businguzi n'okugyera kimwe omu businguzi, kuruga omu kitiinwa kuza omu kitiinwa. Amaani gaawe nigakoorekyerwe omu magara gangye, kandi ninkagume buri izooba nyijwire omu magara g'okuzooka kuruga omuriiwe.

Omu iziina rya Yesu Kristo, Nyakuzooka, Amiina

EBYESHONGORO BY'OMUHANDA GW'OMUSHARABA

GUHAISIBWE, GUHIMBISIBWE

**Guhaisibwe, guhimbisibwe, omuti, omuti
gw'omusharaba Ogwabambirweho, ogwaitiirweho
Mukama waitu mukiza nsi**

1. Ogwakare ogwenzira kuriibwa,
Gukaihaho bugingo bwaitu-abantu
2. Ogu omuti, nyashagama kugweza,
Gureetsire bugingo bw'entacweka.
3. Ogwa kare rufu gukagireeta ;
Ogu nigwo mubingi, gwagibinga
4. Tugwegure na Yezu, tuguheekye,
Nitwemera nyanaku zaitu omu nsi.
5. Tumwebaze Mukama tumusiime,
Mureebi w'ezo naku ze z'ebaasi
6. Ni gwemekwe nyamwanya guguhaabwe
Guzingure gutegyekye n'egi nsi.

NYINA KRISTO AKATANYANGWA

1. Nyina Kristu akataanywanga n'enaku itaine kwehangwa, Yezu bamubambire.
2. Zaabu nk'endiga y'okwita, N'ogwitsya zaagucumita, Yezu bamubambire.
3. Ikamwehunda ga, yaimwe ! N'omwana we nizo zimwe
W'engingo icumitsirwe.
4. Akatuntura yaashaasha, Zaamwita, bambe zaamwasha
Yareeba atemagwirwe.
5. Nyina Kristu, nyakwireeba, Bambe reero kumureeba,
Ha muntu otakaarira.
6. Ezo naku ka n'ebaasi ! Ha muntu-otaineho saasi Bambe kumusaasira
7. Ebyo yaireeba ndikaitwa ! yaasiima Yezu we ku-aitwa
Ensi ngu-etajuumara
8. Obwo shaaha ziri mwenda, Bambe omutima gwayenda,
Yareeba gwaragara.
9. Omuzaire nkuyaagire, Yaiwe maawe owankunzire, Bambe kugwisirize.
10. Omutima ngushemeze, Yesu reero mumuhereze, Maawe, ompamiirize.

MUGUME NA YEZU

**Mugume na Yezu ; Abuyaafereire ;
Muginywe, mugyogyeye Eyi yaabajwereire**

1. Abahakwa ke b'empurizi, Mugyende nawe,
Mushashe nkawe
Haza mugume muri abeefubizi.
2. Emishumba ye y'eshagama, Munyweisibwemu,
Muhagiremu
Kandi mumurye, niwe mwecwa-nyama.
3. Omu kyambu kye ky'eshagama, Abaibikyemu
Aboogyezemu
Mutyo mwezibwe, mube nk'eshakama.
4. Emitunga ye y'eshagama, Mugyenderemu,
Mugyetetwemu,
Bwera bwa Yesu mugize kurama.

KATUTEEKATEEKYE TWEENA

1. Ka tuteekateekye tweena, obusaasi bwa Yezu
Obu yaahuriire weenka, Ha bw'ebibi by'abantu
Enaku z'omucunguzi, Tuzeetegyereze gye
Zitworekye embabazi, Ezi yaatukwatiirwe
2. Yahiiika Getesemaani, Yaatuntura yaatiina
Yaagira omu mubiri, Etuutu y'eshagama
Okutukunda munonga, Nikwo kwamurebeesa
Okaikiriza okufa, Habw'okutambira.

Omutume omureebya, Yaizira Omukama
Yaabanza kumuramutsya, Naagobya omu mutima
Yesu ku yaamureebire, Yaamugambira mpora
Ahanki munywani wangye, Noompayo nonywegyera

4. Bamuboha bamutwara, Omu nju ya Kayaafa
Abacwi b'emanja boona, Bamucwera okufa
Baaguma nibamujuma, okusheesha obwire
Baamucwera amawante, Baamuganzya munonga
5. Petero yaagira enshoni, Yaayoa Omukama
Ku yaabuuzibwe Omuzaana, yaafa okumwehakana
Yesu ku yaahinkukire, Yaareeba entumwa ye
Petro nikwo kucucuka Yaayetisa buzima
6. Omu maisho ga Pilato, Batongana munonga
Omutegyeki yatiina, Yaarekura Baraba
Omukama bamuteera, Empi kandi n'enkoba
Yajwa eshagama nyingi, Baamushaasha okundi
7. Bakashanguruza amahwa, Baagata aha mutwe gwe
Baagateerera munonga, Tibaramusaasiire
Ai Yezu mbwenu twamanya, ku otukunda Buzima,
Okeemera obusaasi, kutujuna ebibi.
8. Omucunguzi wa boona, yaaheka omusharaba
Yaaguhitsya aha kabungo, Akeetwa kalvariyo
Ku yaagugaramireho, weena baamubambaho
Bwanyima bamucumita, omutima baagwata

TWETEISE

Chorus: Tweteise abasiisi abagwire twimukye;

Twentatatre emize mibi; enshobi tuzegukye

1. Abasiisi Yesu naatweta ngu twije, tuganyirwe
Omutamba bworo, naayenda ngu nyentsya tugabirwe.
2. Omujuni Yezu naakunda ngu twere, tubonere
Abahakwa be tumwebingye, turungwe, tushemere.
3. Omukunzi waitu naatwotsya, rubaiha ruhabisa
Ebishuba bye tubyerinde, bireebya, binyagisa
4. Ebihuzyo by'ensi byerunga buriiho binuzire
Orutaahamu nirwekinga, ngu rwije rutumire
5. Emirundi mingi tweshunga, turwebwa orwo rufu;
Amagara g'ensi gatweba ngu hoona ni magufu.
6. Amatungo g'ensi gaarwata, gatungwa, gatsigwaho;
Ebirungi by'eiguru, reero bituura, bigumaho.

TUKUSHABE RUHANGA

Chrs: Tukushabe Ruhanga, Abasiisi tuganyirwe

Tukushabe Ruhanga, Ebishiisho bisaasirwe

1. Nyakusinga omuhaisibwa, Nyamuhanga otubangire
Oturinde oturokore, Tukushangye Rutakirwa.
2. Nyakureeta ebicumuro, Omuryarya tumuhungye
Tumuhungye, Tumwehare, Tukushangye Rutakirwa
3. Nyakutwitsa ebihagaro, anyamuhanga muhangure
Omubingye omusingye, Tukushangye Rutakirwa
4. Nyakusinga omuhaisibwa, Abasiisi nitushaba
Oturinde otuhwezese, Tukushangye Rutakirwa
5. Nyakukunda abakwehitsya , Nyamuhanga tukuhamwe
Eshumi yaitu yaahika, Tukushangye Rutakirwa.

ENTAAMA KIZIFEERA

1. Entaama kizifeera, Yezu nyakuzijwera, akaija kwih wera
2. Omwana wa Ruhanga, Byona nyakubihanga, akaija
yaganga
3. Abuntu yaabakunda, we Yuda yaamutunda n'efeeza
bamuuvunda
4. Engabo zaamutunga, n'entumwa zaazihunga, Yuda
we yaashunga
5. Piraato akeehohoora, n'engabo zaayogoora'
Amaisho zaagazoora

6. Piraato yaateteerwa, Baraba yaarereerwa,
Mukama yaagwerwa
7. Ab'okuza kumwita Baakoma nibariita, Bari _ omuk-
wekiita
8. Enkoba na nyakyaha, Bateera niimutaaha,
Mukama Yaazaaha
9. Amahwa baamujweka, Omuti yaaguheeka, Eibega
ryacweka
10. Nyana ga bambe yaija yaareeba baamunoija, ama-
rira gaija
11. Abaitsi baamubamba Nyakwashwa yaayetamba,
murungi yaatamba
12. Abaitsi baaguhimba, omuti baagutsimba, kibambwe
yaazima
13. Yaafa Kigambo Mwana, Abantu yaatunywana Na
patri twajwana
14. N'empongano _ etakoorwa, Empangano _ etaboora-
wa, encuubwa twazoorwa.

ENTAAMA KIZIFEERA

Chrs: **Twehimbisize omu musharaba gwa Mukama waitu
Yesu Owaatucungwire kandi okuzooka kwaitu.**

1. Ruhanga atugirire embabazi atuhe emigisha,
atureebese amaisho ge
2. Omuhanda gwe gubone kumanywa omu nsi
N'amaani gaawe agarikujuna gamanywe omu mahanga
3. Ai Ruhanga abantu bakuhimbise;
K'abantu boona bakuhimbise.
4. Amahanga geesiime geeshongore ahabw'okush-
emererwa
Ahabwokuba ocwera abantu emanja omu buringaaniza
5. Ai Ruhanga abantu bakuhimbise
K'abantu boona bakuhimbise

BAKAMBONABONESA

1. Bakambonabonesa kaingi okwiha omu butsigazi
bwangye,
Israel abe nikwo yaagamba hati mbwenu.

2. Abahingi bakahinga aha mugongo gwangye
Baahateera emikura miraingwa.
3. Mukama n'ohikiriire ;
Emigoye y'ababi agicwiremu kabiri.

ESHAGAMA Y'OMUHENDO

Chrs:**Eshagama y'omuhendo ya Yezu,
Ekajwisibwa, yaasheesheka
Omujuni w'ensi yoona nyashagama,
Yaagitwogyesa twasaasirwa.**

1. Akatweha kwitwa Yezu, yaayekundira
Akataama k'omutambo kaatuganyiza
2. Obusaasi bwamurenga, bwamutuutura
Eshagama y'amatondo yaatorengyeza
3. Baamutera n'eminyafu yaamushuubura
Omuri gwajwa gwona, gwatonekara
4. Aha musharaba Yezu baamugarika
Amaguru n'emikono byafumagurwa
5. Baamurezya n'omutima, baagutuukura:
Omubiri gwajwa gwona, gwatonekara
6. Eshagama y'ogwo mwita yaagyegyenuka:
Yaizira hamwe n'amaizi, byazimiirira
7. Nyashagama ye tugyoge, n'enyeza-ngoma
Nyashagama ye tuginywe, n'enkinza-enjara.

KU LWAFFE KATONDA WAFFE

1. Ku lwaffe katonda waffe, yayiwa omusaayi gwe
Okusaanya ebibi byaffe, byonna bitusonyiyibwe.
Ffe abakristu tulire nnyo, nga twekkaanya Omukama
Nga tulowooza mu mwoyo, ennaku ze yalaba.
2. Ng'atuuse e Getesemani, n'agamba ng'azirika
“kitange mpweddemu amaanyi, omponye omusaalaba”
Naye olw'okutwagala ennyo, n'amugamba nti:
“ssebo, kola ggwe ky'onjagaliza, tokola kye njagala.”
3. Omutume omulyakuzi n'atuka ku mukama
N'alamusa omulokozi, n'amugwa mu kifuba.
Awo Yezu n'amubuuza nti: “ekikuleese wano?
Gwe nayita ow'omukwwano, ompayo ng'onnywegera.”
4. Baamukwata baamutuusa mu nnyumba eya Kayafa
Bonna wamu ne bagamba nti, “Asaanidde okufa”
Ne bakeesa obudde bwonna nga baduulira Yezu
Bamufujira amalusu, nga bamusekerera.
5. Petro n'akwatibwa ensongi, ng'abuuziddwa omuzaana;
N'alayira; “Simumanyi” bwa'atyo nno n'amwegaana.
Sso yasaasirwa Omukama, ng'amusimbyeko eriiso,
Petro nno n'abanerera, n'avaayo n'alira nnyo.
6. Yezu baamuwayiriza, afe ku musaalaba
Pilato n'asiliriza, n'abateera Balaba.
Mukama ffe twandisaanye, okuliwa omusango,
Ate ggwe otufiiriridde, n'otuwa ekisonyiwo.

7. Ne bamuzingira amaggwa, y'engule ya kabaka.
Baagimusimba mu kyenzi, n'atiriika omusaayi.
Ffe ababi nga titufaayo, kulowooza mu mwoyo
Omukama bweyalumwa, ng'atwagalira ddala.
8. Omulokozi wa bonna, yeetikka omusaalaba,
N'atuuka ku kalvariyo, n'agugalamirako
Baamukomerera anninga, ebigere n'engalo,
Baamufumita omutima, mwe mutuviira enneema.
9. Omutonzi n'alabika, mu kaseera akokufa
Ensi yonna n'ekankana, enjazi ne zaatika.
Omulokozi bwe yafa, byonna byonna byakaaba.

OKAIJA WATAMBA

1. Okaija waatamba, twaganyirwa
Empongano yaitu yaahongibwa
Etuutu y'esaasi yasheesheka
Ngu naitwe g'otweze tukushangye

Yezu mucunguzi w'abantu
Ensi ogihamye ogihumurize
Yezu mucunguzi w'egi nsi
Naitwe ga bambe tukweheereza

2. Okaija waatweha twasaasirwa
Mucunguzi waitu, waagambibwa
Obusaasi bw'amaani waahururwa
Muhangi waatweha nooganga.

3. Muhangi wakunda wagangibwa
Waaterwa buteezi waasharara
Engingo zaahendwa waagandama
Mukunzi w'abooro notukunda.
4. Ogwemi nk'obwato baheekyesa
Waahurwa buhuuzi, waashengurwa
Ago magufa gaawe gaajengama
Muhiira w'ensi egi ngu otuyambe.
5. Nyoko nawe yaija yaashesheka
Ezamwitsire obo tibazibwa
Aha kashozi ako yashoberwa
Yahinduka enwekye ntu atambe
6. Waabambwa n'abaibi, waahemurwa,
Abo banyakwita baananuka
Baakwita n'ekyogi, waasibura
Waashanga sho, yaiwe Nyamurungi !

TEWALI MULALA

Tewali mulala anjagala 'nyyo
Okusinga yezu eyanffirira x2

Sirina mulala anjagala 'nyyo
Okusinga Yezu eyanffirira x2

Sirina mulala anfoka 'nze
Okusinga Yezu eyanffirira x2

Yezu yabonabona ----- okubera nze
Yezu yafumitibwa ----- okubera nze
Yezu yaswazibwa ----- okubera nze
Era nattibwa ----- okubera nze

Tewali mulala anjagala 'nyyo
Okusinga Yezu eyanffira x2

Taliyo, taliyo, taliyo, ddala taliyo

Banange sinamulaba -----taliyo
Afanana yezu ow'omukwano era-ddala taliyo

Banange sinamulaba.....taliyo
afanana Yesu ow'omukwano era---ddala taliyo

Banange sinamulaba----- taliyo
Afanana Yezu ----- taliyo
Ow'mukwano era----- ddala taliyo

Banange sinamulaba
Afanana Yezu ow'ekitibwa era